

春秋：六年，春，城邾瑕。

晋赵鞅帅师伐鲜虞。

吴伐陈。

夏，齐国夏及高张来奔。

叔还会吴于柤。

秋，七月，庚寅，楚子轸卒。

齐阳生入于齐，齐陈乞弑其君荼。

冬，仲孙何忌帅师伐邾。

宋向巢帅师伐曹。

哀公六年：六年，春，晋伐鲜虞，治范氏之乱也。

吴伐陈，复修旧怨也，楚子曰，吾先君与陈有盟，不可以不救，乃救陈，师于城父。

齐陈乞伪事高国者，每朝必骖乘焉，所从必言，诸大夫曰，彼皆偃蹇，将弃子之命，皆曰，高国得君，必逼我，盍去诸，固将谋子，子早图之，图之莫如尽灭之，需事之下也，及朝，则曰，彼虎狼也，见我在子之侧，杀我无日矣，请就之位，又谓诸大夫曰，二子者祸矣，恃得君而欲谋二三子，曰，国之多难，贵宠之由，尽去之而后君定，既成谋矣，盍及其未作也，先诸作而后悔，亦无及也，大夫从之，夏，六月，戊辰，陈乞鲍牧及诸大夫以甲入于公宫，昭子闻之，与惠子乘如公，战于庄，败，国人追之，国夏奔莒，遂及高张晏圉，弦施来奔。

秋，七月，楚子在城父，将救陈，卜战不吉，卜退不吉，王曰，然则死也，再败楚师，不如死，弃盟逃讎，亦不如死，死一也，其死讎乎，命公子申为王，不可，则命公子结，亦不可，则命公子启，五辞而后许，将战，王有疾，庚寅，昭王攻大冥，卒于城父，子闾退曰，君王舍其子而让，群臣敢忘君乎，从君之命，顺也，立君之子，亦顺也，二顺不可失也，与子西，子期，谋潜师闭涂，逆越女之子章立之，而后还，是岁也，有云如众，赤鸟夹日以飞，三日，楚子使问诸周大史，周大史曰，其当王身乎，若祭之，可移于令尹，司马王曰，除腹心之疾，而置诸股肱何益，不谷不有大过，天其夭诸，有罪受罚，又焉移之，遂弗祭，初，昭王有疾，卜曰，河为祟，王弗祭，大夫请祭诸郊，王曰，三代命祀，祭不越望，江汉睢章，楚之望也，祸福之至，不是过也，不谷虽不德，河非所获罪也，遂弗祭，孔子曰，楚昭王知大道矣，其不失国也宜哉，夏书曰，惟彼陶唐，帅彼天常，有此冀方，今失其行，乱其纪纲，乃灭而亡，又曰，允出兹在兹，由己率常可矣。

八月，齐邾意兹来奔，陈僖子使召公子阳生，阳生驾而见南郭且于，曰，尝献马于季孙，不入于上乘，故又献此，请与子乘之，出莱门而告之故，阍止知之，先待诸外，公子曰，事未可知，反与壬也处，戒之，遂行，逮夜至于齐，国人知之，

僖子使子士之母养之，与饋者皆入，冬，十月，丁卯，立之，将盟，鲍子醉而往，其臣差车鲍点，曰，此谁之命也，陈子曰，受命于鲍子，遂诬鲍子曰，子之命也，鲍子曰，女忘君之为孺子牛，而折其齿乎，而背之也，悼公稽首曰，吾子奉义而行者也，若我可，不必亡一大夫，若我不可，不必亡一公子，义则进，否则退，敢不唯子是从，废兴无以乱，则所愿也，鲍子曰，谁非君之子，乃受盟，使胡姬以安孺子如赖，去鬻姒，杀王甲，拘江说，囚王豹于句窠之丘，公使朱毛告于陈子曰，微子则不及此，然君异于器，不可以二，器二不匮，君二多难，敢布诸大夫，僖子不对而泣，曰，君举不信群臣乎，以齐国之困，困又有忧，少君不可以访，是以求长君，庶亦能容群臣乎，不然，夫孺子何罪，毛复命，公悔之，毛曰，君大访于陈子，而图其小，可也，使毛迁孺子于骀，不至，杀诸野幕之下，葬诸爻冒淳。